

Saturday, March 15, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

AMIT SHAH

Union Home Minister Amit Shah chuan Mizoram a rawn tlawh dawn a, ruahman dan chuan vawiin chawhnu hian Aizawl a lo thleng ang.

Union Home Minister Amit Shah hian Assam Rifles, Sector 23 Khatla, Aizawl-ah hun hman turin Mizoram hi a rawn tlawh dawn a ni.

Union Home Minister Amit Shah-a'n zan khat riak tura Mizoram a lo tlawh mek chungchangah Aizawl District Magistrate Lalhriatpuia chuan venhimna khauh tak kalpui a nih theih nan thupek a chhuah a, Union Home Minister programme hmanna tur leh kalna turah te Drone hman a khap a, venhimna khauh taka kalpui a ni bawk.

Aizawl DC Lalhriatpuia chuan Section 163, BNSS 2023 in thuneihna a pek angin, vawiin leh naktuk zing dar 10:30 thleng chu sorkar hmun pawimawh Raj Bhavan, Sector 23 Assam Rifles, Khatla, Mizoram Legislative Assembly Complex, Thuampui Helipad leh a chhehvelah Drone/Aerial Camera leh hetiang lam chi reng reng mi tumahin an thlawh tir tur a ni lo, a ti.

He khapna thupek zawm lo te chu Section 223, BNS 2023 hmangin an chungah hremna an lek dawn a ni.



FICD

Tukin zing khan Fit India Movement hnuaia Fit India Cycling Drive chu Aizawl Vanapa Hall kawtah hman a ni a. He hunah hian Official bakah Cyclist member mi 60 vel an kalkhawm a ni.

He hunah hian Aizawl STC Centre-in-charge Pi. Elizabeth Lalnunmawii Colney chuan kalkhawmte lawmna thuchah tawi sawiin Fit India Cycling Drive in a thiltum a sawi a ni.

Mizoram atanga 'Fit India Cycling Drive' campaign hi Sports & Youth Services Dept Secretary Pu. Lalramsanga Sailo chuan vailiamin Cyclist ho hian Vanapa Hall kawt atangin Dawrpui panin heta tang hian Sikulpuikawn atangin Vanapa Hall kawt an rawn pan leh a ni.

He hunah vek hian 'Ride to Clean Air' campaign a India fang chhuaktu Pu Vanlallawmzuala Varte (Lz Varte) chu telin Sports & Youth Services Dept Official thahnem tak leh SAI Coach leh official thahnem tak an tel bawk a ni.



MYC

Mizoram Youth Commission (MYC) leh TOP International Human Resources Management Consulting, Taiwan te chuan nimin khan Labour, Employment, Skill Development & Entrepreneurship (LESDE) Minister Pu Lalnghinglova Hmar kaihhruainain thawhhona tura bultanna 'Letter of Intent (LOI)' an ziak.

MYC Chairman Office Chamber, MINECO, Khatla-a hun hmanah hian MYC aiawhin MYC Chairman Pu Malsawmzuala Ralte leh TOP International Human Resources Management Consulting aiawhin Chairman Pu Angus Shih ten hming an ziak a ni.

(An thawhhona turah hian TOP International Human Resources Management Consulting, Taiwan te'n cheng nuai 50 an rawn pek tur hmangin MYC Aizawl Campus-ah Chinese tawng zirna, Mandarin Language Learning Centre din a ni ang a. Mizo thalai Mandarin tawng zir chhuakte hian Taiwan-ah hna an thawk zel thei dawn a ni.)

Mizo thalai 1000 Taiwan-a hnathawk tura thawm tum a ni a, bultan nan thalai 100 thawm phawt a ni ang. Hemi hnu hian thawhhona fluantling, MoU buatsaih zui a ni ang a, chumi peih fel hnuah chak taka hmalak nghal a ni ang.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



HORTI MINISTER

Horticulture Minister Prof. Lalnilawma chuan nimin khan Serchhip Mat phaia thlasik thlai chinna hmun a tlawh.

Minister Prof. Lalnilawma chuan Zawlpui phai atang hian tun aia hlawk zawk leh hnianghnar zawka thlai thar chhuah a nih theih nana hmalak dan turte a enpui a, Mat Lui kanna tur Lei tha zawk dawh theih dan turte a en bakah department hrang hrangte nena thawhho zel dan turte an sawi ho nghal bawk a ni.

Serchhip Zawlpui phai chhungah hian Mat lui km 9 vel a luang tlang a, Horticulture Department hian kumtin Zikhlum, Tomato leh thlasik thlai dang chi (seed) nul siamtute hnenah a pechhuak thin a, kum 2024 chhung khan Zikhlum chi bur 100, Tomato chi 100 Pkts, Dawnfawh chi 80 Pkts a pe chhuak a ni.

Tun dinhmunah Serchhip Mat phaiah hian chhungkaw 160 velin thlai hmun leh nul siamin eizawwna ber atan an hmang tangkai mek a ni.

Serchhip Zawlpui-ah hian thlai hrang hrang Zikhlum, Bawkbawn, Tomato, Hmarchapui, Antam, Parbawr, Broccoli, Lettuce, Knol Khol, Carrot etc chin thin niin, kartin Mizoram hmun hrang hrang Aizawl, Lunglei, Saitual etc ah te motor-in trip 20 – 30 vel an thawmchhuak thin a, kumtin Zawlpui atanga thlai hralhna man hi Nuai 300 – 350 vel ni thinin, kumin 2025 pawh hian Nuai 400 chuang leichhuah leh an inbeisei leh a ni.



CONSUMER RIGHTS DAY

Vawiin khan World Consumer Rights Day pualin Kolasib Project Veng YMA Hall-ah Kolasib DCDO office buatsaih in hun hman a ni.

Khuallian, Kolasib DC Pu Robert C. Lalhmangaiha chuan thusawiin, mi zawng zawng hi Consumer kan nih angin thil lei leh hralh chungchangah dikna chanvo an neih te kan hriat chian a tul a ti a, kan dikna chanvo kan chan theih nan tha thlah lovin kan beih zel a tul a ni, a ti a, mi tam takin an dikna chanvo neih te an hriat loh avangin harsatna an tawh thin a, dikna chanvo an humhalh theih nan mi thiam te thusawi ngaithla a, an thuziak te chhiar in, chungte chu in zir nan an hman tangkai a tul a ni, a ti.

DC chuan, mipuiten an dikna chanvo an hriat a, zau zawka mipuite zirtir turin Consumer Union leh Consumer Club hruaitute an pawimawh thu a sawi

a, ni tin mamawh zuartu dawrkai leh sumdawngten bukna leh tehna dik tak an hman theih nan hmalak a pawimawh thu leh bukna dik chu Pathian duh zawng a nih angin dawrkai leh sumdawngte pawhin Pathian duh dan zawm theuh turin a chah bawk.

